



## काँशिर तल्मीह कावु गाटुल



कावु गाटुल छि तस इनसानस वनान युस ओप आसि, मगर तस आसि यि अप्यर गाटुजार बासान।

दपान अकि दूह लोग अख राजु होंज ज़ालस। रातु म्वगलन सूज काव तस छारनि, तिव्याज़ि यिमन त्रेन ओस सख यारानु। काव वोत राजु होंजस निशि तु राजु होंजन वोनस, “चु प्रुछ रातु म्वगलस ज़ि शोठ किथु पॉठ्य म्वकलि येमि ज़ालु मंजु।”

काव आव वुफान वुफान तु वोनन रातु म्वगलस यि हाल। रातु म्वगलन सूज ज़ि हरगाह बु कावस राजु होंजु सुंद म्वकलनपाय बावु, यि छु ओप तु यि गछि योरय क्रकु दिवान दिवान। अमि किन्य लोग रातु म्वगलन मूदमुत। कावन दिचस दिगु पोंशि तु द्राव टाव टाव करान। राजु होंजस निशि वोत तु वोननस ज़ि चोन बूजिथुय द्युत रातु म्वगलन अमानथ। राजु होंजन च्यून कथि हुंद

मतलब। दोपुन कावस ज़ि यि आसिहे ख्वदायि सुंज मरज़ी। अथ क्या करव। नेर चु गछ पानस। काव द्राव अँकिस अंदस तु राजु होंजन लोग मूदमुत। येम्य शख्सन राजु होंज ज़ालस लोगमुत ओस, तँम्य येलि राजु होंज मूदमुत वुछ, तुलुन तु द्युतुन दूर दोरिथ। राजु होंजस येलि इनसानु सुंज नज़र डँज, सु वोथ तु गव वुडान वुडान यारन निशि। यि वुछिथ लोग काव रोशनि ज़ि त्वहि छवु पनुन्य कथ पनुने शायि।

कथ समजावान समजावान वोन रातु म्वगलन कावस, “अगर बु च्ने अस्ल कथ वनुहँय, चु करुहॉख योरु गछानुय टाव टाव, तु शिकॉरिस लगिहे पताह। तेलि म्वकलिहे नु राजु होंज केंह।” \*

